

PUO YA BOPHATLALATSI BA DITABA E MABAPI LE DIPUISANO TSA SARS LE MEKGATLO YA BASEBETSI

22 Motsheanong 2022 - Boetapele ba Ditshebeletso tsa Lekgetho tsa Afrika Borwa (SARS) bo kopane le Mekgatlo ya Basebetsi e emetsweng ke National Education Health and Allied Workers Union (NEHAWU) le Public Servants Association of South Africa (PSA) ho fumana tharollo ditherisanong tse kgitlileng lejwe.

Re buisane le boetapele ba mekgatlo ena e mmedi ya basebetsi ho ba tsebisa hore tseko ya ona ya jwale ya CPI + 7% ha e kgonehe.

Jwalo ka ditheo tse ding tsohle tsa Mmuso, SARS e thefutswe ke diphephetso tsa ditjhelete tse tjamelaneng le naha ya rona mme ka lebaka la seo, kabelo ya SARS ya ditjhelete e tswang Lefapheng la Naha la Matlotlo, ha ya akaretsa ho nyoloha ha meputso. Ka lebaka la kelohlolo ya rona ho tse mabapi le ho fokotsa ditjeo mmoho le mekutu e meng, SARS jwale e kgona ho ba le matlole a itseng a ka lebiswang ho basebetsi ba welang tlasa Yuniti ya Ditherisano.

Matlole ana a tswa ho tse ding tsa dipoloko tse entsweng ngwahola (2021/22) mmoho le dipolokong tseo ho lebelletsweng hore di ka fihlellwa monongwaha (2022/23) tse seng di tjhaetswe monwana ho ka sebedisetswa mehlodi ya batho. Khomishenara Kieswetter o itse: "Ke kgotsofetse hore le tlasa maemo a thata tjena re ntse re kgona ho fana ka kimollo e itseng ya ditjhelete ho basebetsi ba rona. Ke bile ke batla ho hopotsa basebetsi ba rona hore ke lehlohonolo le leholo hore re be re ntse re sebetsa ka nako eo boholo bo hlokanang mesebetsi ha ba bang bona ba le bohloking ba tsa ditjhelete."

Ho latela Foramo e Ikgethang ya Ditherisano e bileng teng ka Moqebelo wa 21 Motsheanong 2022, mekgatlo ya basebetsi e ile ya tsebiswa ka tlhahiso ya Mongamosebetsi mme ka mora moo ha buisanwa le SARS mabapi le mefuta e fapaneng ya ho aba matlole ana ao morero ka ona e leng ho fana ka kimollo ya ditjhelete bakeng sa basebetsi, le ho leka ho tla ka tharollo qakeng ena.

SARS e fane ka nyehelo ena ho Mekgatlo ya Basebetsi ka Sontaha, 22 Motsheanong 2022, e le e felletseng le ya makgaolakgang ho rarolla qaka e mabapi le tseko ya nyollelo ya meputso Dipuisanong tse Batsi tsa Meputso tsa 2022/23 ntle le ho inkela diqeto. Mekgatlo ya Basebetsi e tla buisana le ditho tsa yona ho fumana thomo mme ka mora moo mekga e tla kopana hape ho tswela pele ka dipuisano.

Ho feta moo, SARS e itlamme ho tswela pele ka dipuisano dinthong tse mmalwa tse sa akaretseng ditjhelete tseo mekga ka bobedi e nang le thahasello ya tsona ka sepheo sa ho ntlafatsa tse mabapi le boleng ba basebetsi. Taba ena haesale e ntse e tswela pele ho tloha mahareng a ngwahola.

Boetapele ba SARS bo kgotsofaditswe ke dipuisano tse bileng pakeng tsa mekga tabeng ena ya meputso mme dipuisano tsena di qadile hape mme di tsamaya ka tsela e ahang

le e ntle. Re na le tshepo ya hore ka nyehelo ena, re tla rarolla qaka e renang ha jwale mme re tswela pele ho tsepamisa maikutlo a rona ho sebeletseng balefalekgetho le ho phethahatsa thomo ya rona ya bohlokwa ya ho sebeletsa setjhaba.

Ho fumana lesedi le fetang lena, ikopanye le SARSMedia@sars.gov.za

KE PHETHO